

Date – 27/12/2025

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Home Minister Pu K. Sapdanga chuan ruihhlo do beihpui thlak mek chu ngawrh leh zuala kalpui chhunzawm a nih dawn thu a sawi.
2. Mizote Krismas lawmna a tel ngei ngei, veng/khaw tina kohhran hrang hrang tam berah nimin khan Krismas ruai theh a ni.
3. Kumin Krismas vuakvetah Mizoram, a bikin Aizawl khawpui-ah hnam dang khualzin an pung nasa hle.
4. Kumin January thla atanga tun thla ni 22 thleng khan Mizoramah ruihhlo vanga thi mi 111 an awm tawh.

<><><>

OPERATION JERICHO

Home Minister Pu K. Sapdanga chuan ruihhlo do beihpui thlak mek chu ngawrh leh zuala kalpui chhunzawm a nih dawn thu a sawi.

Pu K. Sapdanga'n Akashvani Aizawl news a hrilh danin December ni 31 thlenga kalpui tura lo ruahman Operation Jericho chu March ni 31 thleng kalpui tura thutlukna siam a nih rualin Myanmar atanga ruihhlo tawlhurutute'n an rawn luhna khan hman thin an thlak nasa hle niin a sawi a. A bik takin Champhai district atanga ruihhlo tawlh thinte chuan an kalkhan ngai an thlak bakah Manipur lama kual a, Mizorama ruihhlo tam tham rawn tawlh luh an tum ni a report a awm avangin Manipur ramri lamah Police dah belh tura ruahmanna siam a nih thu a sawi a. Ngopa lam leh Tipaimukh lama Tuivai lei pahnih leh hmun dang a luh theihnate pawh ngawrh leh zuala ven a nih tur thu home minister chuan a sawi a. He tih lai hian chhim lam, Lawngtlai leh Siaha district lama kaw hreuh an tum ni a thu an dawn bawhzui-in district bawrhsapte chu Central Young Lai Association (CYLA) leh Mara thalai pawl (MTP) te nena tangrual a, ruihhlo tam tham lo lut thei dang tura theihtawpa tan la tura hriattir an nih tawh thu home minister hian a sawi bawh a ni.

Ruihhlo do beihpui thlak mek, Operation Jericho ti a vuah hi September ni 1 atanga kalpui tan kha a ni a. Myanmar nena ramri a ruihhlo tawlhurutute lo luh thinna khanah Police leh a bul hnai khua a tlawmngai pawl branch-te ngawrh takin an duty a, Mizoramah ruihhlo a van bakah a man pawh a to phah hle ni a hriat a ni. He tiang hi a nih avangin December ni 22 a home minister leh excise & narcotics minister hova central YMA hruaitute thukhawm chuan, December ni 31 thleng kalpui tura ruahman Operation Jericho chu pawt sei a, nakum March thla tawp thleng kalpui ni se tiin thutlukna an siam ta a ni.

Operation Jericho kalpui meka ruahmanna pa khat angin CYMA, Police leh Excise & Narcotics hnathawkte chuan tun hnai khan ualau taka damdawi

hmang mi 100 zet khawmin, eitur an pek hnu-ah, Tawngtai Bethel Camping Centre-ah an dahlut a ni.

<><><>

CHRISTMAS FEASTS

Mizote Krismas lawmna a tel ngei ngei, veng/khaw tina kohhran hrang hrang tam berah nimin khan Krismas ruai theh a ni.

Aizawlah chuan nimin tuk hma takah fatu turte chhuak khawmin ran talh leh sa chan bakah tlang ruai atana eitur dangte buatsaihin vengtinah ruai tur an buatsaih a. Ruai hi nimin tlai lamah theh a ni a. Krismas ni khan hmun thenkhatah chuan kohhran tam vak lovin Krismas ruai hi an theh tawh a, hemi ni a theh tawh nimina ruai nawn leh pawh an awm a. Niminah khan kohhran tam ber chuan ruai an theh a ni. Ruai atan hian bawng, sial leh vawk an talh ber a, hetiang sa ei thei lote tan ar leh sangha te an siam bawk. Tun lai thangthar zingah sa ei lo, thlai chauh ei an tam tawh avangin thlai lam pawh chi hrang hrang an siam a ni. Ruai theh hma leh zan lama lengkhawm zui tur pawh kohhran thahnem tak an awm a ni.

SFX

Lunglei-ah pawh Krismas ruai theh tur hian zing atangin an inbuatsaih a. Lunglei a kan Corr. Thanghmingliana Renthlei hnena bawng chaw luttu ber pakhat leh Butcher Association a an hruaitu Pu H.Zairemmawia’n a hrilh danin Lunglei khawpum a Kohhran hrang hrang te hian vawi khat ruaitheh na’n hian Bawng 20-25 vel an talh ang a chhut a ni a. Bawng pakhat hi a tlangpuuin Rs nuai khat sing thum man vel a ni a ti a. Lunglei khawpui chhungah veng 23 vel a awm a, bawng manah cheng nuai 29 leh sing 9 vel senral thin anga chhut a ni a. Vawk, ar, sangha, thlai leh thil dang senso nena chhut chuan cheng nuai 60 chuang vel zen zawn sen ral thin a ni. Thleng leh no tawih thei lo hmang lo tura inzirtirna a nasa hle chungin ruaitheh na’n hian dispo thleng hmang an tam zawk niin a lang. Thir hmanga siam, damdawiin thleng ang deuh hmang an awm nual bawk. Damdawiin leh Police station awmna venga Kohhran lian zawkte chuan kumdang ang bawkin damlo leh Police te Masi ruai an suah a ni.

Champhai District ah Kohhran tam zawkin nimin khan Krismas lawmna ruai an theh a. Krismas ni khan kohhran thehkhat chuan Krismas lawmna ruai kilin nimina ruai nawn te pawh an awm. Champhai District ah hian buaina leh harsatna awm lovin Krismas lawmna hun hman a niin kohhran ten programme an duan sa dungzuiin inkhawm leh lengkhawm te an buatsaih a. Nizan khan kohhran ten inkhawm nei chhunzawmin lenkhawm zawh rualin Krismas lawmna chu an tiak tlangpui ta a ni.

Serchhip leh a chheh velah pawh Krismas lawmna ruai theh a ni a. Kohhran tam ber chuan nimin khan krismas lawmna ruai hi thehin, nimin krismas ni khan Serchhip Kawnpui kohhranah nu kum 70 vel mi thi a awm tih loh chu khawtlangah Krismas lawmna boruak tibuitu dang a awm lo.

Nimin khan Kolasib a kohhran hrang hrangte chuan Christmas ruai an theh a, nimin piah lama ruai theh Catholic kohhran, Independent Church of India (ICI) leh Reformed Presbyterian Church (RPC) te pawhin nimin khan Christmas ruai an nawn a ni.

<><><>

TOURISTS

Kumin Krismas vuakvetah Mizoram, a bikin Aizawl khawpui-ah hnam dang khualzin (tourists) an pung nasa hle.

Tourism minister Pu Lalnghinglova Hmar hnena atanga thu dawn danin kumin November thla chawhnu lam atang khan Aizawl leh a chhehvela mikhual thlenna hmun hotel leh homestay tam zawk hi a khat reng a, Krismas hma deuh khan homestay neitute hian an khah tawh hlawm avangin mikhual thleng thei an awm leh awm loh an inzawt kual nasa hle ni a thu dawn a ni. Mikhual thlenna nei lo an tam em avangin, Paying Guest/Hostel a awmte Krismas chawlh hmanga an khaw lama an haw avangin hetiang neitute chuan an hostel-te mikhual thlen theih turin an siam rem bawk a ni.

Krismas ni khan Aizawla kohhran hrang hrang biak-inah hnam dang khualzin hmuh tur an thahnem hle a, kohhran thenkhat chuan an puala inlawmna (greetings) pawh biak inah an sawi chhuak nghe nghe a. Dawrpui Presbyterian kohhran biak-inah pawh Krismas lawmna inkhawmah hnam dang khualzin mi 30 chuang an inkhawm ni a thu dawn a ni. He'ng khualzinte hian nimin khan Krismas ruaite thehin Aizawl chhehvel khualzin tlawh thin hmun hrang hrang an tlawh a. A bikin Reiek tlang, Sakawrhmutuai tlang, Hangilunglentlang leh Chawlhmun a Solomon's Temple te hi a tlawh hlawh zual te a ni.

Tourism Department hian sorkar laipua Ministry of Tourism nen khualzin hipna turin December 15-20 khan Lammualah Winter Festival an buatsaih tawh a, December 23 khan Aizawlah Krismas Paradise buatsaihin December 31 hian a huhova tlai ni tla tur thlir paha rimawi nena intihhlumna, Sakawrhmutuai Sunset ti a vuah chu an buatsaih dawn a; January ni 6 leh ni 7 hian Phuaibuang Tlaizawng Paradise an buatsaih dawn bawk a, January 6-ah Tuivai luiah nghakuai chiah runpui an buatsaih ang a, Phuaibuangah adventure tourism lam hawi programme leh rimawi nen hun hman a ni ang.

<><><>

AIZAWL MARKET

Krismas lawmna avanga nimin piah Krismas Ni leh nimin, Kohhran tam zawkin Krismas ruai an theh niah te dawr hrang hrang khar a nih hnuah tukin khan Aizawl bazar leh veng hrang hranga dawr te hawn tan leh a ni.

Tukin khan Aizawl khawpui chhunga dawr te chu inhawng tan lehin zingkarah pawh kawngpui dunga eitur leh chawhmeh zuar bakah eichawp dawr thenkhat chu tuk dang ang bawkin an inhawng leh tawh a. Akashvani palaiin tunhnaia Aizawl bazara dawrkaite a kawmnaah Krismas ruai theh tuk, December Ni 26-ah hi chuan a tlangpuiin Krismas dawn hnaih chu pha tawh lo mah se bazara mipui veivak an tam ve tho thin thu an sawi a. Krismas hmaa mamawh lama bazar hman lo leh duh ang lei kim ve hman lo te Kumthar lo thleng tur inpuahchahna ni pah fawma an bazar ve hun a nih thu an sawi a ni.

Vawiinah hian a ngai angin bazar dawr lian hrang hrang te pawh an inhawng tlangpui dawn tih sumdawngte chuan an sawi a. Hetihruah hian a dawr neitute chawlh hahdam an duh rih avanga dawr khar pawh an awm leh nual dawn tih an sawi bawk a ni.

<><><>

DRUG-RELATED DEATHS

Kumin January thla atanga December ni 22 thleng khan Mizoramah ruihhlo vanga thi mi 111 an awm tawh.

Excise & Narcotics leh Police department-in an chhinchhiah danin kuminah hian ruihhlo vangin mi 111 an thi tawh a, mipa 94 leh hmeichhia 17 an ni. Kumina ruihhlo thihpui zat hi kum 2005 (kum 20 chhung)-a Mizorama ruihhlo avanga thi tam ber kum a ni a. A tam ber dawttu chu kum 2023 kha niin khami kum khan mi 76 an thi a ni. Kumin chhunga ruihhlo vanga thi zingah hian heroin leh damdawi dang tihpawlh vanga thi an tam ber a, heroin chauh khawih avanga thi pawh an tam hle a ni. He ti hian kum 1984-a heroin avanga Mizoram a thi mi pakhat an chhinchhiah hmasak ber atanga tun thlengin ruihhlo vanga thi hi mi 1,990 an tling tawh a. Mipa 1,747 leh hmeichhia 243 an ni tawh a ni. Nachhawka lar tak spasmoxon leh parvon spa vanga nunna chan an la tam ber a, mi 1,161 zet an ni a. He damdawi hi sorkar laipui-in siam a khap tak hnu-ah Mizoramah pawh he damdawi hmansual avanga thi an tlem chho telh telh a, kum 2017 atanga tun thlengin spasmoxon leh parvon spa avanga thi an awm leh tawh lo a ni.

Tun hma khan heroin leh damdawi ruih theih dang emaw damdawi ruih theih chi hrang hrang khawih pawlh vanga thi hi an awm meuh lova. Kum 1984 leh 1998 inkar chhung khan chutianga vanga thi chu chhinchhiah an awm lo. Kum 1999 leh 2006 inkar (kum 7) chhung khan hetiang damdawi khawih pawlh vanga thi hi mi 17 an awm a. Kum 2007 atang khan an awm lo leh vang a, kum 2007 leh kum 2011 inkar pawh khan hetiang vanga thi hi chhinchhiah an awm lo. Kum 2012 atanga awm leh tanin kum 2013 atang phei kha chuan thihphah an tam chho ta hle a ni. Ruihhlo thihpuite hi kum 14 leh kum 57 inkar deuh vek an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CHOLERA

Lawngtlai leh Siaha district a tuihri leng mek chu a darh belh vak lo chungin Lawngtlai a Lairam Christian Medical Centre (LCMC) damdawi-inah tuihri natna kai ni ngei a hriat 1 dahluh belh a ni.

He ti hian Lairam Isua Krista Baptist Kohhran (LIKBBK) enkawl LCMC damdawi-in a tuihri vei ni a rinhlelh enkawl mek chu 8 an ni ta a. Puan tawh angin tun kar chho khan tuihri vei ni a hriat mi 4 an thi a, November a mi 6 thi nen Lawngtlai district-ah mi 10 an thi tawh a ni. Tuna tuihri avanga nunna chan mi 4 leh kai tharte sample hi Zoram Medical College & Hospital-ah thawn a ni tawh a, Laboratory-a endikna hmuh dan nghah mek a ni. LCMC damdawi-ina doctor sawi danin tuihri natna kaite hi Myanmar lam nena inhne

hnai, ramri vela sumdawng leh chetla vek an ni a. Tualchhungah a la darh rih lo ni-a ngaih a ni a. Myanmar lama sumdawng leh lirthei khalth lutte'n he natna hi an kai a, an chenpuite atang pawhin hri hi a darh lo ni a sawi a ni. Hetiang chiah hian Siaha district a Tipa Community Health Centre (CHC) a enkawl mek mi 6-te pawh lirthei khalth a Myanmar a bungraw va dahtu leh sumdawng vek an nih thu Additional DC Pu Abraham Beirazi Khithie chuan a sawi.

Siaha leh Lawngtlai district thuneitute'n tuihri leng avanga Myanmar ramri an khar chu khar chhonzawm zel a la ni a. Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. A ruka kawng danga kal an awm a nih loh chuan insumdawnna atana kawng hman pui berte chu khar tlat a ni rih. Chin state chhim lam Paletwa leh a chheh vel khua-ah tuihri hi a len avangin insumdawn tawnna a Mizoram lam atanga inhnamhnawihte'n an kai tih hria-in ramri hi khar a ni a. Lawngtlai district bawrhsap chuan thla 2 chhung ramri hi kharin Siaha district thuneitute chuan kum thar January thleng hi an khar phawt a ni.

<><><>

AWARD

Mizo naupang zaithiam Esther Lalduhawmi Hnamte chuan India rama naupang chawimawina sang ber Pradhan Mantri Rashtriya Bal Puraskar chu President Droupadi Murmu hnen atangin a dawng.

Nimin khan he chawimawina semchhuahna hun hi New Delhi-a Vigyan Bhavan-ah buatsaih a ni a, ramchhunga state 18 a naupang 20 in he chawimawina hi an dawng a ni. Pradhan Mantri Rashtriya Bal Puraskar chawimawina hi naupang huaisente, sports lama mi chungnung bik te, Computer leh AI lama thiamna nei bikte leh performing Arts lama thiamna nei bikte hnenah kumtina hlan thin a ni. Esther Lalduhawmi Hnamte hi hriat theih chinah Mizo naupang he chawimawina dawng hmasa ber a ni a. Chawimawina sem zawh hnu hian chawhnu dar 12.30 atangin New Delhi a Bharat Mandapam-ah ram pum huap naupangte pual inkhawm Veer Bal Diwas 2025 hun hman zui a ni a. Hetah hian Prime Minister Narendra Modi chuan thu a sawi bakah Union Minister for Women and Child Development Pi Annpurna Devi chuan thu a sawi bawk a ni. He mi hnu hian Ashoka Hotel-ah chaw an ei khawm leh a ni.

Mizoram Larsap General Vijay Kumar Singh chuan Esther Lalduhawmi Hnamte in zai hmanga Pradhan Mantri Rashtriya Bal Puraskar chawimawina a dawng thei chu a lawmpui thu leh a hla sakte chuan rampum a fanchhuah thu a sawi a. A chawimawina dawn chu Mizoram leh ramchhung tana entawntlak leh ngaihhlut awm tak a ni a ti a. Women & Child Development Minister Pi Lalrinpuii pawhin Esther Lalduhawmi Hnamte chu naupang chhuanawm tak zinga thlanchhuah a ni chu a lawmpui thu leh Estheri chu India hnam hla ‘Vande Mataram’ kum 4 mi lek a nih laia a sak, India ram puma ngaithlatu leh hluttu mi maktaduai tel a neih avanga he chawimawina hi dawng thei a ni a ti.

Lunglei College venga cheng, Esther Hnamte tia hriat lar hi India hnam hla ‘Vande Mataram’ tih hla a sak atangin ramchhungah hriat a hlawh chho a hlawh chho tan a, wawiina chawimawina a dawwnaah hian a nu leh a putea te’n an tawiawm a ni. Pradhan Mantri Rashtriya Bal Puraskar chawimawina hi

Ministry of Women and Child Development-in naupang theihna chungchuang
neite hnena kumtina a hlan thin a ni.

<><><>